




CONSELHO DE IMPRENSA DE TIMOR-LESTE

RELATÓRIU ATIVIDADE “SORUMUTU PARTIDUS POLÍTIKUS HO IMPRENSA” (Political Parties Meet the Press)

INSTITUISAUN/AJÉNSIA	CONSELHO DE IMPRENSA DE TIMOR-LESTE
Diresaun	Diresaun Jerál Ezekutiva
Departamentu/Divizaun	• Comunicaçao Soçíal, Relasaun Institusionál no Cooperasaun • Dezenvolvimentu no Análiza Mídia • Apoio Jurídiku, Étika no Liberdade Imprensa • Rekursu Umanu • Administrasaun Finansas, Aprovizionamentu no Lojística
Data no Fatín	1 Jullu, 8 Jullu no 15 Jullu 2017 Estúdiu GMN, Díli
Finansiamentu	• Orsamentu Estadu (CI) • Doadores/sponsor
Kustu Atividades	Orsamentu: • Orsamentu estadu ne'ebé aloka ba Conselho de Imprensa hamutuk 5,112.50; gasta ona hamutuk USD 2,326.35 no balansu USD 2,786.15 • Apoio hosi UNDP Timor-Leste liuhosi: imprimi banners, publikasaun hanesan avizu iha TV nomós hahan kalan. Sira halo pagamentu ho sira nia sistema aprovizionamentu rasik.
Objetivu Atividades	1. Atu mídia sira bele hatene liutan programa no polítika kada partidu ninian hodi pública ba públiku molok eleisaun parlamentár. 2. Atu fó espasu ba mídia sira iha asesu hanesan ba informasaun hosi partidu polítiku sira no mós loke espasu hanesan ba partidu polítiku sira atu fahe informasaun ba mídia sira. 3. Atu Partidu Polítiku sira bele hetan direitu antena ho balansu.



CONSELHO DE IMPRENSA DE TIMOR-LESTE

	4. Atu Mídia sira bele hetan oportunidade entrevista ho Partidu Polítiku hotu.
Dezkrisaun breve ba atividades	1. Sábado, 1 Julu 2017 I Sorumutu Partidu Polítiku ho Mídia. 2. Sábado, 8 Julu 2017 II sorumutu Partidu Polítiku ho Mídia. 3. Sábado, 15 Julu 2017 III sorumutu Partidu Polítiku ho Mídia.
Rezultadu Atuál	Rezultadu Atuál: 1. Partidu Polítiku sira hetan fatin hanesan hodi ba hatu'o sira nia programa liuhosi mídia TV no Rádio. 2. Jornalista hetan oportunidade atu klarifika no hetan informasaun detalladu hosi Partidu Polítiku sira. 3. Públiku/audénsia iha asesu ba informasaun ho hanesan hosi Partidu Polítiku sira hotu.
Planu no Rekomendasaun	1. Kontinua programa interativu ne'e regularmente atu asegura públiku sira nia direitu ba informasaun no atu efetiva mídia sira nia funsaun kontrolu sosiál 2. Implementa programa direita iha ambiénte diferente ka transmisaun hosi liur ba estúdiu. 3. Presiza envolve mídia hotu iha programa interativu ne'e. 4. Kapasitasaun ba jornalista sira atu prepara perguntas krítikus ba transmisaun programa refere.
Rezumu Relatóriu Atividade	Rezumu atividade "Political Parties Meet The Press" iha aneksa
Dokumentus Anexu	1. Relatoriu orsamentu hosi parte Conselho de Imprensa nian 2. Kode konduta asinadu hosi partidu politiku sira 3. Lista prezensa enkontru preparasaun programa 4. Lista prezensa sorumutu 4 entre jornalista ho partidu polituku sira.
Data no Asinatura hosi ema ne'ebé halo Relatóriu	Data: 22 / 09 / 2017  Ana Teresa Sequeira Diretora Executiva



CONSELHO DE IMPRENSA DE TIMOR-LESTE

Supervizór ninia komentáriu no asinatura	Data: 22 / 09 / 2017  Virgílio da Silva Guterres Prezidente
---	--

RELATÓRIU POLITICAL PARTIES MEET THE PRESS

I. INTRODUSAUN

Relatóriu ida ne'e relata kona-ba progresu implementasaun programa SORUMUTU PARTIDU POLÍTIKU SIRA HO IMPRENSA (*Political Parties Meet the Press*) ne'ebé Conselho de Imprensa de Timor-Leste realiza.

Iha Periodu Eleisaun Parlamentár, Conselho de Imprensa ho United Nation Development Programme (UNDP) Timor-Leste ne'ebé hetan apoiu hosi Povu Japaun, realiza atividade conjunta sorumutu Partidu Polítiku ho Mídia. Programa ne'e envolve kuadru máximu hosi Partidu Polítiku sira no Jornalista hosi Mídia Imprimi, Online, Rádio no Televizaun, iha periodu fulan Jullu 2017 nia laran hodi fó espasu ba Partidu Polítiku sira hotu bele hetan direitu antena hodi bele explora sira nia programa polítiku sira liuhosi kanál mídia, nune'e mós fó biban ba Jornalista hosi mídia hotu bele hetan oportunidade atu dadalia ho Partidu Polítiku hotu hodi hetan informasaun ne'ebé loos hosi fontes ne'ebé loos ka kredibel. Jornalista sira mós bele hatene liutan programa no política kada partidu ninian hodi fó sai informasaun ne'ebé loos ba públiku molok, durante no hafoin eleisaun parlamentár. Alein ida ne'e bele mós hametin relasaun di'ak entre Jornalista sira ho Partidu Polítiku hotu.

Programa ne'e sei sai nu'udár meu ida ba jornalista ho partidu polítiku sira atu hasoru malu no fahe informaçaun ba malu. Alein ida ne'e, atu:



CONSELHO DE IMPRENSA DE TIMOR-LESTE

- 1) Fó espasu hanesan ba partidu polítiku hotu atu bele ko'alia ba média kona-ba informasaun ne'ebé ligadu ba política no programa partidu nian.
- 2) Média iha asesu hanesan no direta ba informasaun sira partidu polítiku sira nian.
- 3) Rekursu informasaun ba média sai di'ak liu no ajuda publikasaun média nian ho informasaun loloos no kompleta
- 4) Atu enkoraja mós kanál média sira atu hatu'o programa edukasaun sívika ba sidadaun ka eleitór sira.
- 5) Atu hari'l relasaun di'ak entre kanál média sira ho partidu polítiku sira iha ambiente política democrásia.

Sorumutu Partidu Polítiku ho imprensa hala'o iha faze dala tolu; primeiru iha lora 1 Julu 2017 envolve Bloku 1 no Partidu 6 mak hanesan BUP, APMT, KHUNTO, PEP, PST, PDP NO CNRT segundu iha lora 8 Julu 2017 partisipa hosi Partidu 7 mak hanesan PR, UDT, PDC, MLPM, PLP, PD no UNDERTIM. Entretantu faze terseiru iha lora 15 Julu 2017 envolve Partidu hitu (7) mak hanesan PUDD, PTD, F. Mudansa, PSD, CASDT, PDN no FRETILIN participantes iha "Political Parties Meet the Press" ne'e mak komponente média sira ne'ebé eziste iha nasaun ida ne'e hanesan Jornalista no kuadru Partidu Polítiku sira.

Sorumutu Partidu Polítiku ho imprensa ne'ebé realiza iha kada Sábado fim semana ne'e hahú iha tuku 08:30 to'o tuku 10:30 kalan, ne'ebé partisipa hosi kontestante Eleisaun Parlamentár, Partidu 20 no Bloku ida (1), Jornalista hosi média nasional no ajénsia internacional sira iha Timor-Leste. Debate ne'e transmite direita hosi kanál Rádio no Televizaun GMN.

Programa ne'e hala'o ho hanoin atu:

- 1) Média sira hetan asesu hanesan ba informasaun hosi partidu hothotu
- 2) Relasaun entre kanál média sira ho partidu política sira di'ak no metin ona.
- 3) Partidu polítiku sira iha asesu hanesan ba kobertura média nian
- 4) Partidu polítiku sira hatu'o ona sira ninia programa no sidadaun sira determina ona sira ninia eskoilla [pilihan].
- 5) Kanál média sira hatu'o ona programa edukasaun sívika ba públiku. Sidadaun sira iha ona koñesimentu ba sira nia direitu no dever.



CONSELHO DE IMPRENSA DE TIMOR-LESTE

II. REZUMU ATIVIDADES

Programa ne'e hala'o ho atividades sira hanesan, halo introdusaun programa refere ba Partidu Polítiku sira no mós mídia sira ne'ebé organiza iha sesaun ketaketak, molok tama ba sorumutu refere. Ho nune'e iha atividade importante rua mak akontese:

1. Introdusaun programa ba Partidus Polítikus no mós jornalista sira
2. Sorumutu Partidu Polítiku ho Imprensa liuhosi Debate TV no Rádio iha kanál Grupu Mídia Nasionál (GMN)
 - Sorumutu I – ParPol 1-7
 - Sorumutu II – ParPol 8-14
 - Sorumutu III – ParPol 15-21
 - Sorumutu IV – ParPol 5 ne'ebé hetan asentu iha Parlamentu Nasionál.

1. INTRODUSAUN PROGRAMA BA PARTIDU POLÍTIKU NO IMPRENSA SIRA

Introdusaun programa ba ema hirak ne'ebé involve iha programa ne'e rasik sai importante tebes, liu-liu ba Partidus Polítikus 20 no Bloku 1 ne'ebé mak sai panelista iha programa ne'e no mós ba jornalista sira ne'ebé mak sei partisipa hodi halo perguntas ba panelista sira. Tanba ne'e Conselho de Imprensa realiza enkontru preparasaun ho parte rua ne'e atu bele esplika di'ak liu tan kona-ba programa ne'e.

Primeiru enkontru hala'o iha Salaun Otel Beach Garden iha loron 16 Junu 2017, sorumutu ne'e fahe ba sesaun rua, sesaun dader ba jornalista sira no sesaun loraik hala'o ho pesoál Partidu Polítiku sira. Reuniaun ne'e, partisipa hosi jornalista ema na'in 17, feto 5 no mane 12, no representante partidus polítiku sira mak UDT, PEP, PUDD, PSD, PR, MLPM, APMT, PD, PST, Frente Mudansa, PLP, PDC no CASDT.



CONSELHO DE IMPRENSA DE TIMOR-LESTE



Foto: konvidadus kuadru Partidu Polítiku sira foto hamutuk ho Prezidente Conselho de Imprensa ho nia estrutura, iha enkontru ba dahuluk hodi ko'alia kona-ba realizasaun programa Political Parties Meet the Press, iha salaun Beach Garden, Praias dos Couqueirus Díli.

Hosi enkontru dahuluk nian, representante partidu polítiku sira sujere atu hadi'a pontu balu iha kódigu konduta diskusaun nian. Sira mós sujere atu apresenta fila fali kódigu konduta ne'e. Bazeia ba sujestaun sira ne'e Conselho de Imprensa hala'o tan enkontru daruak ho pesoál Partidu sira no mós jornalista sira iha salaun Fundasaun Oriente-Díli, iha loron 23 Juñu 2017.

Enkontru daruak ne'e apresenta hikas fali kódigu konduta ne'ebé halo ona revizaun atu bele aprova hamutuk hosi parte rua ne'ebé involve, nune'e mós representante hosi partidu polítiku sira iha loron ida ne'e sira dada númeru sorteiu hodi determina grupu partidu ida ne'ebé mak avansa uluk ba halo diálogu ho jornalista sira.



CONSELHO DE IMPRENSA DE TIMOR-LESTE



Foto1: Presidente Conselho de Imprensa ho representante hosi UNDP. Foto 2: Participantes hosi CI ho Diretor no Xefi editór sira. Foto 3: jornalista hosi média nasonál sira ne'ebé rona hela esplikasaun hosi Presidente Conselho de Imprensa no parte UNDP.

Sesaun ne'e hetan partisipasaun hosi jornalista sira hamutuk na'in 20 kompostu hosi feto 3 no mane na'in 17 no mós partidu polítiku sira mak hanesan BUP, APMT, KHUNTO, PEP, PST, PDP no Partidu CNRT, grupu daruak inklui Partidu PR, UDT, PDC, MLPM, PLP, PD, no Partidu UNDERTIM. Grupu datolu kompostu hosi Partidu PUDD, PTD, FRENTE MUDANSA, PSD, CASDT, PDN no Partidu FRETILIN.

Iha introdusaun programa *Political Parties Meet the Press* ne'e apresenta kona-ba:

a) Kódigu konduta

Kódigu konduta ne'e esprika liu kona-ba importante atu hakotu, hosi fofoun kedas, konjuntu matadalan sira ne'ebé, la ho hanoín atu afeta liberdade editoríal jornalista sira nian, klarifika termu sira ba hala'o sesaun refere sira ne'e entre kandidatu sira ne'ebé involve. Pontu hirak sita iha konduta ne'e mak hanesan tuir mai ne'e:



CONSELHO DE IMPRENSA DE TIMOR-LESTE

Ba Partidu Polítiku sira nia representante sira:

1. Respeitu Partidu Polítiku seluk nia representante wainhira hatu'o deklarasaun no hatudu atetude diak
2. Responde pergunta sira ne'ebe mak moderador, jornalista no partidu politiku sira seluk husu
3. Hato'o ideas sira ho respeito ba partidu politiku sira seluk no audiencia
4. Foti responsabilidade ba atitute sira pasadu no agora nian, deklarasaun no asaun sira hotu ne'ebe nia halo
5. Hatudu hahalok sivilizadu durante sorumutu no konsekuensia sira husi sorumutu

Ba Moderador

1. Mensiona no responde ba hahalok la sivilizadu sira no modera sorumutu hodi hetan dialogu ne'ebe respeituzu
2. Aplika regras sorumutu nia hanesan ba partidu politiku sira no entidade sira iha audensia sorumutu nian
3. Husu akuntabilidade Partidu Polítiku sira nian hodi sira koalia lia los no mos iha integridade
4. Justu ba Partidu Polítiku sira wainhira iha pergunta sira ne'ebe komplexu
5. Respeitu Partidu Polítiku sira iha nia interasaun ho Partidu Polítiku sira seluk.

Ba Audiencia (Konvidadu no Apoiantes sira)

1. Respeita no hatudu atetude sivilizadu ba audensia sira seluk, Partidu Polítiku sira no Moderador
2. La bele kria disturbu ba Audensia sira seluk, ba Partidu Polítiku sira no moderador
3. Foti responsabilidade ba atetude personal, koalia no asaun sira
4. Labele hatu'o pergunta ka koalia ba Partidu Polítiku sira no moderador
5. Rona didiak moderador no Partidu Polítiku sira nia koalia no koko atu komprende saida mak sira koalia



CONSELHO DE IMPRENSA DE TIMOR-LESTE

Ba Meius Komunikaun Sosial no Jornalista Sira

1. GMN-TV la bele transmite publisidade husi Partidu Polítiku sira durante transmisaun direta sorumutu nian
2. GMN-TV la bele foka ba apoiantes sira seluk wainhira Representante husi Partidu Polítiku seluk mak koalía
3. GMN-TV tenki tahe oras foku ba Partidu Polítiku sira ho sira seluk hanesan
4. GMN-TV foka ba representante Partidu Polítiku ida-idak wainhira nia hatoo nia resposta no la bele foka ba audensia ka partidu politiku sira seluk
5. Estasaun radio no televizasaun sira seluk laiha diretu atu halo transmisaun direta, maibe foti imazen no audio husi GMN-TV
6. Meius Komunikaun Sosial no Jornalista sira ho identidade lolos deit mak bele halo kobertura iha programa Sorumutu Partidu Polítiku ho Mídia nian
7. Pergunta bele halo deit iha minutu 1, laos halo komentariu
8. Pergunta la bele insulta/atake ema nia personalidade, prezisa apresenta baze/faktus ba pergunta klarifikasaun sira
9. Respeitu meius komunikaun sosial no jornalista sira seluk
10. Jornalista sira sei tur iha fatin ne'ebe organizadora determina
11. Fotografu sira la bele uza flash wainhira hasai foto
12. Meius Komunikaun Sosial Online bele halo *live streaming* ba sorumutu hosi deit kanal GMN TV nian.

b) Tema

Diálogu ne'e sei foka liu ba asuntu ESTADU KOMUNIKASAUN DO ESTADU (*The Status of Communication of the State*). Fatór komunikaun nu'udár asuntu krusial ne'ebé mak iha influensia ba aspetu hotu moris nian. Bainhiha komunikaun lao la di'ak, implika mós ba ema nia moris di'ak. Tanba ne'e asuntu komunikaun sei sai xavi hodi liga ba aspetu hotu moris nian ne'ebé mak sei ko'alia iha sorumutu ida ne'e.

c) Lala'ok



CONSELHO DE IMPRENSA DE TIMOR-LESTE

Métodu ne'ebé uza iha programa *Political Parties Meet the Press* mak "diskusaun". Faze sira diskusaun nian mak hanesan tuir mai ne'e:

- 1) Moderadór sei dirije sesaun ne'e hodi konvida representante hosi partidu sira atu hola fatin.
- 2) Representante partidu sira sei hola fatin hamutuk iha fatin ne'ebé Komisaun Organizadór determina ona.
- 3) Moderadór mós sei hatu'o regra ka kódigu konduta diskusaun nian ba representante partidu no jornalista sira.
- 4) Moderadór sei fó tempu ba partidu ida-ida atu ko'alia [aprezentasaun] iha minute tolu (3) nia laran.
- 5) Hafoin apresentasaun, moderadór sei dirije diskusaun liuhosi fó tempu hanesan ba jornalista sira atu husu pergunta, no hatu'o sujestaun ka komentáriu iha minutu ida (1) nia laran.
- 6) Númeriu sorteiu ba representante partidu sira iha diskusaun ne'e bázeia ba númeru sorteiu ofisiál hosi Tribunál Rekursu.

Maneira ne'ebé mak sei aplika ba jornalista sira atu halo perguntas no mós maneira ne'ebé mak fó ba partidu polítiku sira atu hatan perguntas maka komisaun organizadora prepara kaixa ida ne'ebé tau ona média sira nia naran iha laran. Partidu polítiku tuir ninia tempu sei simu kaixa hafoin dada surat tahan iha laran. Bainhira dada hetan média ida nia naran, ninia jornalista mak sei hatu'o pergunta ba partidu polítiku ne'e.

Partidu polítiku sira sei dada naran média sira hodi ko'alia tuir númeru iha lista ne'ebé anúnsia ona hosi Tribunal Rekursu, ezemplu; iha grupu 1-7 sei hahú hosi BUP; iha grupu 8-14 sei hahú hosi PR; iha grupu 14-21 sei hahú hosi PUDD. Jornalista sei hatu'o pergunta iha minutu ida (1) nia laran no partidu polítiku sei hatu'o resposta iha minutu tolu (3) nia laran. Pergunta hanesan sei la repete hosi jornalista seluk. Partidus polítikus bele debate asuntu relativa ruma ne'ebé presiza duni maibé ho akompaña hosi moderadór/a.

Iha jornalista hosi média 25 mak sei partisipa hodi hatu'o perguntas. Kada média ida representa jornalista ida. Kada jornalista ida prepara perguntas minimu 7 ba partidu 7 ne'ebe marka prezensa iha estudiu. Pergunta sei hatu'o iha minutu 1 nia laran. Jornalista sei halo pergunta bainhira partidu



CONSELHO DE IMPRENSA DE TIMOR-LESTE

polítiku ida dada hetan sira nia naran média. Bainhira oras sei iha, dada rifa sei kontinua ba segundu no terseira ronda ho caixa foun.

d) Partisipante

- 1) Órgaun másimu ka substituénte hosi partidus 20 no Bloku 1 ne'ebé konkore iha Eleisaun Parlamentár.
- 2) Jornalista no xefi editór sira hosi média nasional 25 iha Díli

e) Kalendáriu

Kalendáriu ba sorumu ka diálogu nian mak hanesan tuir mai:

Data	Partidu Polítiku	Moderadór/a	Fatin
1 Julu 17	7 (1-7)	Virgílio da Silva Guterres	GMN Estúdiu
8 Julu 17	7 (8-14)	Virgílio da Silva Guterres	GMN Estúdiu
15 Julu 17	7 (15-21)	Virgílio da Silva Guterres	GMN Estúdiu

f) Dada númeru sorteia hodi determina lora sorumutu

Eleisaun Parlamentar tinan 2017 ida ne'e lori kontestante kuaze partidu polítiku 20 no bloku 1 hodi kontesta ba forma governu ba dala VII nian. Tanba númeru partidus polítikus ne'ebé kontesta iha eleisaun ida ne'e barak tebes no atu jere oinsá sira hotu bele hetan oportunidade hanesan iha programa ida ne'e, Conselho de Imprensa husu konkordánsia hosi sira rasik hodi fahe sira ba grupu 3; grupu Partidu Polítiku/bloku 1-7, 8-14 no 15-21. Hosi grupu sira ne'e, deside representante 1 hodi ba dada númeru sorteiu ne'ebé prepara ona iha caixa segredu no rezultadu hatudu katak Grup 1-7 sei hala'o diálogu ho jornalista sira iha lora 1/07/2017, grup 8-14 iha lora 08/07/2017 no Grup 15-21 iha lora 15/07/2017.

Ho nune'e Grup 1-7 (primeira grup) mak Bloku Unidade Popular - BUP, Partidu AMPT, KHUNTO, PEP, PST, PDP no Partidu CNRT. Grup 8-14 (segundu grup) mak Partidu Republikanu - PR, UDT, PDC, MPLP, PLP, PD



CONSELHO DE IMPRENSA DE TIMOR-LESTE

no Partidu UNDERTIM. Grupu 15-21 (terseiru grupu) mak PUDD, PTD, FM, PSD, CASDT, PDN no Partidu FRETILIN.



Foto 1&2: Representante kuadru Partidu Polítiku rona no husu perguntas. Foto 2: Prezidente CI Virgílio da Silva Guterres halo klarifikasaun. Foto 3: Representante Partidu Polítiku sira dada número sorteiu.

Molak hakat ba sorumutu ne'e, ne'ebe mak transmite direita hosi estúdiu GMN, representante partidu politiku sira asina Nota Intendimentu ne'ebe sai nudar regras ba sira iha sorumutu ida ne'e. *Partidu* Timorense Demokratiku (PTD) deit mak la asina tanba marka prezensa iha sorumutu ida ne'e ho razaun pesoal. Dokumentus Nota Intendimentu anexu.

2. SORUMUTU PARTIDU POLÍTIKU SIRA HO MÍDIA

a) Sorumutu Partidu Polítiku, Sábado 1 Jullu 2017



CONSELHO DE IMPRENSA DE TIMOR-LESTE

Hosi korenti reuniaun sira ne'ebé mak akontese ho pesoál Partidu Polítiku no Jornalista, ikus mai Conselho de Imprensa de Timor-Leste (CI) serbisu hamutuk ho Grupu Mídia Nasionál (GMN-TV) no Organizaasaun Nosoens Unidas ba Programa Dezenvolvimentu (UNDP) ne'ebé hetan tulun hosi povu Japaun, realiza primeira faze programa Political Parties Meet the Press ka Sorumutu Partidus Polítikus ho Imprensa.



Foto 1: Panelista hosi BUP, APMT, KHUNTO, PEP, PST, PDP no CNRT. Foto 2: Moderadór Virgílio da Silva Guterres. Foto 3: Audénsia. Foto 4 no 5: Partisipantes Zevonia Vieira hosi mídia online TAFARA no Waytila Pereira hosi Rádio Metro ható'o perguntas.

Sorumutu primeira faze entre partidus polítikus ho imprensa ne'e realiza iha sábado, 1 Jullu 2017, ne'ebé transmiti direita hosi estúdiu Rádio no Tv GMN, durante oras rua (2) hosi tuku 20:30 to'o 22:30 kalan ne'ebé partisipa hosi partidu nen (6) no bloku ida (1) mak hanesan Partidu APMT, KHUNTO, PEP, PST, PDP, CNRT, no Bloku Unidade Popular (BUP).



CONSELHO DE IMPRENSA DE TIMOR-LESTE

Partisipasaun hosi Jornalista nasionál no internasionál sira maka hanesan Timor Post, STL, Independente, Timoroman, GMN, Matadalan, Time Timor, Rádio Liberdade, Rádio Komunidade Comoro, Rádio Metro, Agência Tatoli, Tafara.org no ajência Kyodo News.

Iha introdusaun, Prezidente CI Virgílio da Silva Guterres nu'udár moderadór informa kona-ba programa ne'e ninia importánsia ba públiku, ba mídia no mós partidu polítiku sira rasik. Durante oras rua (2), Jornalista sira kestiona maka'as liu kona-ba oinsá partidu polítiku sira kaer ukun, sei fó prioridade saída ba seitór komunikasaun sosiál Timor-Leste. Levanta mós kestaun seluk kona-ba oinsá bele rezolve problema dezempregu estruturál ne'ebé oras ne'e akontese.

Iha parte seluk, jornalista sira mós kestiona maka'as kona-ba komitmentu partidu polítiku sira nian ba luta hasoru korrupsaun tanba to'o oras ne'e seidak iha Lei Anti-Korrupsaun (LAK). Jornalista sira mós husu atu governasaun foun mai atu halo lakon tiha birokrásia ne'ebé oras ne'e difikulta tebes atividade jornalízmú ninian, hodi asesu ba dokumentus estadu ne'e nian inklui atu entrevista. Hatan ba perguntas no preokupasaun jornalista hirak ne'e, partidu polítiku sira ne'ebé partisipa iha sorumutu primeira faze komprometidu atu hadi'a no hametin liutan kestaun sira ne'ebé Jornalista sira hato'o.

Enkontru evaluasaun ho jornalista sira

Hosi sorumutu ho partidus polítiku sira iha loron 1 fulan Jullu, fó hela lisaun ida ba jornalista hodi inisia enkontru evaluasaun hamutuk ida, atu nune'e ba sorumutu daruak no datoluk nian bele di'ak liu tan. Bazeia ba sujestaun hosi jornalista sira, Conselho de Imprensa organiza fila fali enkontru ida ho jornalista participantes sira ne'ebé mak partisipa ona iha sorumutu dahuluk nian. Iha enkontru ne'e alein halo evaluasaun ba lala'ok sorumutu ne'e, UNDP ho Conselho de Imprensa mós prepara referénsia ruma atu apoiu jornalista hodi halo perguntas kítiku.

Tanba bazeia ba observasaun UNDP ho Conselho de Imprensa nian hare katak jornalista sira sei menus referénsia no mós dados atu bele forma perguntas ne'ebé kítiku, bazeia ba evidénsia no ho qualidade.



CONSELHO DE IMPRENSA DE TIMOR-LESTE

Enkontru ne'e hala'o iha loron 6 Jullu 2017, iha salaun enkontru Conselho de Imprensa, ne'ebé mak partisipa hosi Jornalista na'in 25, feto 6 no mane 19. Jornalista hirak ne'e mai hosi média sira hanesan Rádio Metro FM, Rádio LABEH, Rádio Liberdade Díli, Rádio Klibur, Rádio Komunidade Comoro, Rádio Rakambia, Jornál Matadalan, Jornál Timoroman, Jornál Bussines Timor, Jornál Tempo Semanál, Jornál Timor Post, Jornál One Timor, Ajénsia Kyodo News, Ajénsia TATOLI, STL no jornalista RTTL.ep.



Foto 1: Jornalista, Editor no korespondente sira rona hela esplikasaun. Foto 2: Prezidente CI halo esplikasaun kona-ba oinsá atu hato'o perguntas ne'ebé kompleta ho dadus. Foto 3: Diretora Ezekutiva esplika kona-ba lala'ok debate. Foto 4: Partisipantes sira akompaña diskusaun iha enkontru preparasaun

b. Sorumutu Partidu Polítiku, Sábado, 8 Jullu 2017

Iha debate periodu daruak iha loron 8 Jullu 2017, foka ba "Estadu Komunikaun Estadu nian" realiza iha GMN, liuhosi kooperasaun entre Conselho de Imprensa de Timor-Leste no UNDP, ne'ebé hetan suporta hosi Governu Japaun. Iha



CONSELHO DE IMPRENSA DE TIMOR-LESTE

segundu sorumutu ne'e lori Partidus Polítikus hitu (7) hanesan PR, UDT, PDC, MLPM, PLP, PD no Partidu UNDERTIM.

Iha sorumutu ne'e Jornalista sira hato'o perguntas kona-ba polítika saída maka Partidu Polítiku sira sei halo ba Conselho de Imprensa nune'e bele ajuda Jornalista sira atu asesu ba karteira profesional. Partidu Polítiku iha komitmentu boot atu hametin Conselho de Imprensa nune'e bele tau matan ba órgaun komunikasaun sosiál sira iha Timor-Leste, tanba laiha imprensa maka demokrásia mós mate.



Foto1: Panelista hosi PR, UDT, PDC, MLPM, PLP, PD no UNDERTIM. Foto 2-4: Jornalis Prezado Ximenes hosi Rádio Loriku Lian, Dessy hosi Rádio Liberdade no Alves hosi GMN hato'o perguntas.

Representante Partidu Libertasaun Popular (PLP), Azevedo Marçal, hatete papél Gorvenu maka oinsá liuhosi kapasitasaun sira ba Conselho de Imprensa no Jornalista sira nune'e bele sai profesionál liutan. Entretantu Prezidente PD, Mariano "Asanami" Sabino, hatete demokrásia moris tanba mídia, no demokrásia hanesan fíziku de'it maibé klamar maka mídia, tanba ne'e Governu



CONSELHO DE IMPRENSA DE TIMOR-LESTE

tenke tau prioridade ba área komunikasaun sosiál, nune'e povu Timor-Leste bele sai komunikativu liutan.

Reprezentante Partidu UNDERTIM, Adolfo da Silva, hatete Governu presiza halo lei ida rigorozu liu ba ema ne'ebé impede atividade jornalista sira atu halo kobertura tanba liuhosi média maka povu ka públiku bele asesu informasaun ida loloos no justu.

Reprezentante Partidu Republikanu (PR), Deolindo de Jesus, konsidera komunikasaun nu'udár meius ida atu ema ka grupu ida bele komunika ba malu.

Sekretáriu Jerál Partidu UDT, Francisco David Carlos, hatete laiha diskriminasaun ba média sira hotu. Governasaun ne'ebé de'it presiza apoiu nafatin serbisu média nian ba apoiu dezvoltimentu iha Timor-Leste. Reprezentante Partidu Demokrátiku Cristão - PDC, Geraldo Ximenes, hatete komunikasaun importante tebes ba sosiedade sira, Governu no instituisoens hotu-hotu nune'e bele hatu'o informasaun ba malu ho loos no justu. Vise Prezidente Partidu MLPM, Ivo Soares da Costa, hatete média iha Liberdade tomak atu hala'o atividade jornálizmu ninian maibé segredu estadu nian balun mós labele atu fó sai ba públiku tanba média iha liberdade maibé la'os liberdade totalmente.

Partidu Polítiku sira iha polítika ida klaru hodi asegura imprensa nune'e bele hametin no haburas liberdade imprensa iha ita nia rain ho responsabilidade. Tanba ne'e husu atu serbisu nafatin ho liberdade ne'ebé média sira iha atu haklaken lia loos ba povu.

c. Sorumutu Partidu Polítiku, Sábado, 15 Jullu 2017

Ba terceira faze, finalmente foka papél média importante ba dezvoltimentu, realiza iha loron sábado, 15 Jullu 2017, ne'ebé partisipa hosi partidu polítiku hitu (7) hanesan PUDD, PTD, FM, PSD, CASDT, PDN no Partidu FRETILIN. Partidu Timorence Democrático – PTD, ne'ebé lidera hosi Sra. Aliança da Conceição Araujo, labele marka prejença iha sorumutu ba faze terceiro ho rajaun iha asuntu família, maibé ida ne'e la fó impaktu tanba diskusaun la'o di'ak ho prejença Partidu nen (6) seluk.



CONSELHO DE IMPRENSA DE TIMOR-LESTE

Durante debate, Partidu Polítiku sira kompromete katak, papél média importante tebes ba dezentvolvimentu Timor-Leste nian, tanba ne'e bainhira sira kaer ukun kontinua fó prioridade ba seitór komunikasaun sosiál iha país ne'e. Partidu Polítiku sira mós konsidera, média nu'udár klamar ba demokrásia, sé laiha média maka demokrásia mós mate, tanba ne'e média tenke livre hala'o nia kna'ar tuir kódigu konduta ne'ebé aprova ona hosi Conselho de Imprensa de Timor-Leste.

Mosu lamentasaun barak hosi jornalista perante representante Partidu Polítiku sira katak, dalabarak hetan limitasaun atu asesu ba informasaun, asesu ba fonte kredível no hetan baku hosi oknum seguransa balun. Mosu mós lamentasaun seluk katak Polítika hosi partidu polítiku sira nian ba jornalista sira atu hasoru karteira profesionál ne'ebé sei fasilita hosi Conselho de Imprensa de Timor-Leste. Iha parte seluk, perguntas balun mai hosi jornalista sira kona-ba oinsá polítika Partidu Polítiku nian ba seitór órgaun komunikasaun sosiál sira iha Timor-Leste hodi pomove no hametin liberdade imprensa no liberdade espresaun iha Timor-Leste.

Preokupasaun sira ne'e pertencente tebes ba Partidu Polítiku sira, katak lider sé de'it, partidu polítiku ida ne'ebé de'it maka sei lidera Governu, labele tau limitasaun ba liberdade imprensa iha Timor-Leste. Partidu Polítiku sira mós iha vontade boot, katak Timor-Leste nu'udár nasaun ida iha hela prosesu konstrusaun estadu iha seitór oi-oin, tanba ne'e papél média importante tebes hodi apoiu TL sai nasaun ida di'ak liu ba futuru. Partidu Polítiku sira husu ba entidade órgaun Komunikasaun sosiál sira atu kontinua serbisu ba povu no nasaun Timor-Leste, ho responsabilidade tomak, hodi fó apoiu ba nasaun nune'e povu iha país ne'e sai komunikadu liutan.

Programa sorumutu entre Partidu Polítiku ho Imprensa, tema "Estadu Komunikasaun Estadu nian" realiza hosi GMN, liuhosi kooperasaun entre Conselho de Imprensa de Timor-Leste no UNDP, ne'ebé hetan suporta hosi Governu Japaun. Sorumutu ne'e modera hosi Presidente Conselho de Imprensa, Virgílio da Silva Guterres.



CONSELHO DE IMPRENSA DE TIMOR-LESTE



Foto1: Audéncia no representante Rádio Liberdade, Francisco Gari hato'o pergunta. Foto2: Panelista hosi PUDD, PTD, F. Mudansa, PSD, CASDT, PDN no FRETILIN. Foto3: Audéncia. Foto4: Jornalista hato'o pergunta.

d. Sorumutu Partidu Polítiku, Sábado, 7 Agostu 2017

Hafoin tribunal rekursu públika rezultadu Eleisaun Parlamentár tinan 2017, Conselho de Imprensa kontinua realiza Programa *Political Parties Meet The Press*, iha Segunda-Feira, lora 7 fulan Agostu tinan 2017. Sorumutu ida ne'e konvida partidu polítiku 5 ne'ebé hakat liu bareira 4% hanesan Partidu FRETILIN, CNRT, PLP, PD no KHUNTO ne'ebé hetan asentu iha Parlamentu Nasional. Representante partidu polítiku 4 seluk marka prezensa iha sorumutu ne'e, maibe kuadru hosi FRETILIN nu'udár partidu ne'ebé manan maioria simples la marka prezensa. Razaun ne'ebé komisaun organizadora simu hosi orgaun masimu partidu nian katak FRETILIN okupadu ho negosiasaun atu forma VII Governo konstitusionál.

Programa ne'ebé transmite direita hosi kanál Rádio no Televizaun GMN ne'e hahú tuku 20:30 to'o tuku 22:30 kalan Otl. Prezidente Virgílio da Silva Guterres mak modera sorumutu ne'e. Formatu sorumutu hanesan ho sorumutu sira



CONSELHO DE IMPRENSA DE TIMOR-LESTE

ne'ebé halo uluk, ne'e mak hafoin moderador halo pergunta jeral iha inisiu sei loka dada rifa ba média sira atu hatu'o perguntas. Jornalista sira nia perguntas foka liu ba possibilidade formasaun VII Governu Konstitusionál no oinsá partidu polítiku hirak ne'e kumpri sira nia promessa hirak ne'ebé sira halo ona ba eleitores sira durante kampaña Eleisaun Parlamentár.



Foto 1: Panelista partidus polítikus ne'ebé manán votus iha Eleisaun Parlameta mak FRETILIN (la partisipa), CNRT, PLP no KHUNTO. Foto2: Audénsia.

Orador ne'ebé mai koalía iha sorumutu ida ne'e mak Prezidente Conselho Diretiva Nacional hosi Partidu CNRT, Deonísio Babo; Portavós PLP, Fidelis Magalhães; Sekretáriu Jerál Partidu PD, António da Conceição no Sekretáriu Jerál Partidu KHUNTO, José da Silva.

Iha sorumutu ne'e CNRT reafirma ninia pozisaun nudar opozisaun maski nune'e sira tau importansia ba governasaun ida ne'ebé diak. "Importante tenke iha



CONSELHO DE IMPRENSA DE TIMOR-LESTE

balansu de Governasaun ida atu iha check and balance ne'ebé di'ak, tanba ne'e maka CNRT opta katak pozisaun Partidu hola di'ak liu maka kontribui ba Governu ida tuir mai liu hosi opozisaun." dehan Deonísio Babo.

Nune'e mos PLP, iha sorumutu ne'e Portavos Partidu informa katak sira nia preferénsia maka sai opozisaun. "PLP Partidu mais vokasionadu atu hakna'ar-án hanesan partidu ida iha opozisaun, maibé prosesu la'o hela, PLP mós iha sentidu de estadu, nakloke nafatin atu rona intensoens, atu rona ideia, hosi partidu sira seluk, prinsipalmente partidu mais votadu." Dehan Fidelis Magalhães.

Entretanto Sekretáriu Jerál Partidu PD reafirma sira nia pozisaun ne'ebé atu promove demokrásia. "Ami nafatin opta ba responsabilidade polítika ne'ebé maka tenke fó ba nasaun no fó ba povu, nune'e PD mós nakloke ba diálogo ba forma Governu ho Partidu mais votadu." dehan , António da Conceição.

Hosi Partidu KHUNTO, Sekretáriu Jerál Partidu nian enfaze komunikaun importante iha formasaun governu. "Presiza kria komunikaun polítika, diálogo ho Partidu sira ne'ebé hetan asentu, para bele estabelese governu ida ne'ebé forte nune'e bele halo dezenvolvimentu di'ak ba povu no rai ida ne'e, ami nia pozisaun maka ne'e, ami hein." dehan José da Silva.

Iha segimentu perguntas hosi Jornalista sira, Jornalista sira barak liu foka ba possibilidade formasaun governu no realiza promessa sira ne'ebé halo ona iha periodu kampaña eleisaun. Kuaze Partidu Polítiku ne'ebé hetan asentu iha fleksibilidade ba diálogo ba formasaun Governu no reafirma sira nia komitmentu atu implementa programa hirak ne'ebé sira promete ona.



CONSELHO DE IMPRENSA DE TIMOR-LESTE



Foto: Foto hamutuk jornalista, moderadór ho panelista hosi partidus politikus ne'ebé manan votus iha Eleisaun Parlamentar (eseptu FRETILIN), ne'e mak CNRT, PLP no KHUNTO.

III. KONKLUSAUN

Konklusaun hosi relatóriu ida ne'e maka, maske sei hasoru obstáklun balun durante organiza sorumutu ida ne'e, hanesan iha Jornalista hosi Mídia balun la partisipa iha sorumutu no Jornalista balun la hetan oportunidade atu hatu'o perguntas tamba kestaun tempu no seluk tan, maibé Conselho de Imprensa kontinua hadi'a no hadi'a di'ak liutan to'o sorumutu ikus, Jornalista hotu hetan oportunidade ne'ebé hanesan ho di'ak hodi bele hatu'o perguntas.

IV. PLANU NO REKOMENDASAUN

a) Planu

- Conselho de Imprensa de Timor-Leste ho UNDP sei asina nota intendementu ida ba hametin kooperasaun hodi apoiu nafatin programa Sorumutu Partidus Polítikus ho Imprensa ba epizódium ne'ebé determinadu.



CONSELHO DE IMPRENSA DE TIMOR-LESTE

- Conselho de Imprensa de Timor-Leste ho UNDP sei kontinua fasilita programa sorumutu ba jornalista sira liuhosi fó treinamentu jornalízmú no hanoin krítiku ho intensivú atu ajuda jornalista sira bele forma pergunta sira ho krítiku liu.
- Conselho de Imprensa de Timor-Leste sei asina nota intendementu ida ho Grupu Mídia Nasionál (GMN) atu fasilita implementasaun programa ida ne'e.

b) Rekomendasaun

- Organiza diálogu hanesan entre jornalista ho autoridade mak kaer lei no ukun atu fó espasu ba públiku hodi akompaña didi'ak progresu no dezenvolvimentu nasaun nian ho kompletu.
- Fasilita jornalista sira ho data no dados ne'ebé bele sai referénsia ba sira. Kapasita jornalista sira atu iha sorumtu ka diálogu sira tuir mai, jornalista sira bele husu perguntas ne'ebé iha baze ba data no faktus.
- Presiza fó atensaun ba sorumu ka diálogu sira tuir mai atu iha formatu ne'ebé interativu liu tan no fó espasu barak ba jornalista sira atu halo'o perguntas.
- Realizasaun sorumutu ka diálogu bele mós tetu tok atu halo iha fatin nakloke ka sai hosi estúdiu.

V. RELATÓRIU FINANSAS

Relatoriu finansas ba atividades ida ne'e konklui ona no anexa mós iha relatório atividade ida ne'e.

--- 000 ---